

**Uunga siunnersuut: Akileraarusersuinikkut iliuitsit aqputigalugit nunatsinni inuit aningaasatigut pissakinnerusut atugaasa, tamatumani anaanaasut ataataasullu kisimiittut arlariinnik meeraqartitertut oqilisaassiffigineqarsinnaanerit pillugu apeqquteqaat aallaavigalugu oqallisissiaq.**

(Inatsisartunut ilaasortaq Aqqaluaq B. Egede, Inuit Ataqatigiit)

### **Akissuteqaat**

(Aningaasaqarnermut Nunamullu Namminermit Naalakkersuisoq)

### **Siullermeerneqarnera**

Inatsisartunut ilaasortaq Aqqaluaq B. Egede, Inuit Ataqatigiit, apeqquteqaat aallaavigalugu oqallinnissamik siunnersuuteqarami, inuit aningaasatigut pissakinnerusut ullumikkornit pitsaanerusunik atugassaqalernissaat siunertaralugu inuiaqatigiit qanoq aaqqissuunneqarsinnaanerit pillugu oqallinnissatsinnik pissutissaqalersitsivoq.

Inuiaqatigiinni pingaaruteqartutigit arlaqartutigit nutarterisoqartariaqalerneranik siunnersuuteqartup oqarnera Naalakkersuisut isumaqatigaat, aammalu ukiuni aggersuni suliassarpassuaqut eqqarsaatigalugit Inuit Ataqatigiit suleqataarusunnermik neqerooruteqarnerat assorsuaq nuannerpoq. Nutarterinissat innuttaasunit tamanit malugineqarumaarnissaat neriutigaara. Taamaammatt nutarterinissami politikikkut suleqatigiissinnaagutta tamanna pingaaruteqarlunnartussaavoq. Suleqatigiissinnaanissarput uanga neriutigaara.

Nutarterinissami anguniagassanut pingaarnernut ilaassaaq inuit aningaasatigut pissakinnerusut inuuniarnerminni atukkaminnik pitsanngorsaasinnaanerannik annertusaanissaq. Ullumikkut aaqqissuussaannerput inunnut aningaasatigut pissakinnerusunut aporfissiivallaarpoq. Suliffeqarnissaq ilaannut imminut akilersinnaangilaq. Ilinniakkamik aallartitsinissaq allanut aningaasaqarniarnikkut unammilligassaqarnarpallaarsinnaavoq. Suliassaraarput aporfiusinnaasut amerlanerpaat aaqqiissuteqarfiginissaat.

Inunnut inersimasunut sulisinnaassuseqartunut tamanut pingaartuuvoq imminut napatinnissaq. Imminut pilersorsinnaaneq imminut naleqartinnermik kinguneqartarpoq. Siusinaartumik soraarnerussutisiaqartitsisarnerup nutarteriffigineqarnissaa aamma utoqqalinersiuteqartitsisarnerup nutarteriffigineqarnissaa pillugit siunnersuummik Naalakkersuisut UKA 2014-imi saqummiussaqaassapput. Nutarterinissaq siusinaartumik soraarnerussutisiaqalersartut aamma utoqqalinersiuteqalersartut – ajornangippat – sivisunerpaamik suliffeqartarnissaannik sulileqqittarnissaannilluunniit kajungilersitsissaaq.

Immaqa oqarumasoaqassaaq isumaginninnermi aaqqissuussaareersut assigiinngitsut aqputigalugit aningaasat tunniunneqartartut qaffaannarsinnaagivut, tassuunakkullu inuit

pissakinnerusut aningaasaqarniarnerat pitsanngorsarlugu. Taamaaliornissaq akissaqartinngilarput, taamaammat pisariinaarlugu aaqqiinerit taamaattut siumungaaq itigarteriissavakka. Kisianni eqqartorusupparput qanoq ililluta aaqqissuussinerit tamakku pisariaqartitsinerpaanut sammisunngortinneqarnissaat. Pisortat aningaasartuutaat ukiuni aggersuni amerliartuinnartussaapput. Taamaassaaq kommuninut aamma nunatta karsianut. Pisortat karsii akileraarutinik qaffaanikkut, aningaasarsiaqqortusiartuaarneq ilutigalugu akileraarnerulersitsinikkut, akitsuutinik qaffakkiartuaartitsinikkut assigisaasigulluunniit aningaasanik amerlanerusunik pissarsisinneqarsinnaapput. Kisianni kommunit karsiisa nunattalu karsiata aningaasaqarniarnerat ukiuni aggersuni ima ilungersunartigisussaapput, allaat ajornartorsiutit akileraarutit akitsuutillu qaffannerinnaasigut qaangerneqarsinnaassanatik. Taamaattumik ajornartorsiutitta aaqqiissuteqarfiginissaat siunertarlugu eqqarsaatigilluagaanerusunik nassaarniartariaqarpugut.

Taamatut oqaaseqarlunga Inatsisartut pitsaasumik angusaqarfiulluuartumillu oqallinnissaat qilanaaraara.